

## Morning Regional Dogri News Bulletin, 12<sup>th</sup> August 2024

मार्निंग डोगरी न्यूज़ बुलेटिन, समें. 09-20 Hrs



### Headlines

1. पैरिस ओलंपिक्स 2024 दा शानदार रंगारंग समारोह कन्नै समापन, भारत ऐकती 71मीं थाहरे पर रेहा। प्रधानमंत्री नरेन्द्र मोदी होरें आखेआ ऐ जे भारत दे सबबने खडारिएं अपना बेहतरीन प्रदर्शन कीता ते हर भारतीय गी उंदे पर मान ऐ।
2. केन्द्री मंत्री डॉ. जितेन्द्र सिंह होरें आखेआ ऐ जे आतंकवाद गी लेइयै सुरक्षाबलें अपनी कार्यनीति च बड्डा बदलाव आंदा ऐ ते तौले गै हालात पूरी चाल्ली सामान्य होई जांगन।
3. पुलस महानिदेशक आर.आर.स्वैन होरें आखेआ ऐ जे ग्राम रक्षा गार्ड वीडिजी गी बीएसएफ दे कन्नै आतंकवाद रोधी सुरक्षा ग्रिड दे तौरा पर इस्तेमाल कीता जाग।
4. उपराज्यपाल मनोज सिन्हा होरें आखेआ ऐ जे जम्मू कश्मीर च विधानसभा चुनां तौले कराए जांगन ते इस बारे मुकदा फैसला चुनां आयोग नै लैना ऐ।
5. सरकार करसानें बागवानें दे हितें गी ध्यानै च रखदे होई बागवानी क्षेत्र लेई बी फसल सुरखा स्कीम शुरू करोग।



### Paris Olympics

पैरिस ओलंपिक्स 2024 दा समापन समारोह स्टेट डी फ्रांस च लगा जेहदे च केइएं दर्शकें हिस्सा लैता ते एथलीटें दी कामयाबी दा जश्न मनाया गेआ। भारत नै कुल 6 तगमे जित्ते जिंदे च 1 चांदी दा ते 5 कैह दे तगमे शामिल न। एहदे कन्नै भारत अंक तालिका च 71मीं थाहर पर रेहा। जिसलै के पिछली बारी टोक्यो ओलंपिक्स 2020 च भारत नै 48मीं थाहर हासल कीती ही। जित्थें भारत नै कुल 7 तगमें जित्ते हे जिंदे च 1 सुन्ने दा, 2 चांदी दे ते 4 कैह दे तगमे शामिल हे। इस बारी अंकतालिका च पैहली थाहर पर अमरीका ऐ जिन्ने कुल 126 ओलंपिक तगमे अपने नां कीते न, जिंदे च 40 सुन्ने दे बी शामिल न। चीन नै बी 40 सुन्ने दे तगमे सनें 91में तगमे जित्तिथै दूई थाहर हासल कीती ऐ। इआं गै जापान 20 सुन्ने दे तगमे सनें कुल 45 तगमे जित्तिथै त्रीह थाहर पर रेहा।



## Dr. Jatinder Singh

प्रधानमंत्री हुंदे दफ्तरै च राज्य मंत्री डॉ. जितेन्द्र सिंह होरें आखेआ ऐ जे आतंकवाद रोधी कारवाइए च सुरक्षा बलें अपनी कार्जनीति च बड्डा बदलाव आंदा ऐ ते औने आले किश हफ्तें दे अंदर सुरक्षा बल हालात गी पूरी चाल्ली काबू च करी लैने च कामयाब होई जांगन। डॉ. सिंह होरें कल उधमपुर जिले दी चनैनी तैहसील च सरकारी हायर सकेँडरी स्कूल लोआए गेदे इक जनता दरबार दरान बोला'रदे हे। इस मौके उनें "डाक्टर्स ऑन व्हील" नां कन्नै शुरु कीती गेदी आर्टिफिशल सेवा दा बी शुरुआत कीती। किश महिला आप सहायता समूहें ते स्टार्ट अपस आस्सेआ उत्थें इे नमैश बी लाई गेदी ही, जिसी मंत्री होरें दिक्खेआ ते उंदी सराहना कीती।



## DGP VDG

जम्मू कश्मीर पुलस दे डरैक्टर जनरल आर.आर.स्वैन होरें आखेआ ऐ जे विलेज डिफेंस गार्ड गी बीएसएफ ते पुलस दे कन्नै ओकड़े इलाकें च बी तैनात कीता जाग जेहूँ अंतराश्ट्री बन्ने कन्नै लगदे न तां जे देश-दुश्मन अनासरें दे भैड़े मंसूबें गी नाकाम कीता जाई सकै। उनें आखेआ जे अज्जै-कल्लै दे थेआरें, उपकरणें ते राती'लै दिक्खी सकने च सखाल आले उपकरणें कन्नै लैस वीडिजी, बीएसएफ ते पुलस कन्नै रलियै कम्म करगन। डीजीपी होर सांबा जिले दे सरकारी हाई स्कूल राजपुरा च वीडिजीए दे इक समूह कन्नै गल्लबात करै करदे हे। उआं उनें आखेआ जे वीडिजीए दे बवस्थित कम्मकाज लेई मानक संचालन प्रक्रियाएं गी मगरा अधिसूचित कीता जाग। उनें आखेआ जे इंदी शमूलियत बगैर आतंकवाद खलाफ खरे नतीजे हासल करना मुश्कल ऐ। उनें आखेआ जे जम्मू कश्मीर पुलस दलेर वीडिजीए गी बतौर एसपीओ भर्ती करने थमां पिच्छे नेई हटोग।



## Encounter Udhampur

उधमपुर जिले दे उपरले पहाडी इलाकें खनेड च जंदी राती सुरक्षा बलें ते आतंकवादिएं बश्कार परतियै गोलीबारी होई। मंगलवारें इस्सै खनेड ते बसंतगढ़ पुलस स्टेशन हेठ पौंदे आले दोआले दे इलाके च चलाए गेदे तुपाई अभियान दरान किश चिरै लेई गोलीबारी होई ही जेहूँ बाद थमां गै इलाके च तुपाई अभियान जारी हा। घने जंगले आला एह इक कठन इलाका कल ऐतवारें अधिकारिए जानकारी दित्ती ह ते इलाके च परतियै आतंकवादिएं गोली चलाई ही जेहूँ पर जवाबी कारवाई कीती गई ते दो तरफा गोलीबारी दा

सिलसिला किश चिरै लेई जारी रेआ। उधमपुर दे इनें उपरले पहाड़ी जंगलें संदिग्ध आतंकवादिएं दे छप्पे होने दी जानकारी ऐ जेहदे लेई बड्डे पैमाने पर आतंकवाद रोधी तुपाई अभियान जारी ऐ।



## Amarnath Yatra

कल होई दिऐं भारी बरखें दे चलदे श्री अमरनाथ जी दी यात्रा गी बालटाल आले रस्ते थमां रोकना पेई गेआ ऐ। पहलगाम आले रस्ते पर जारी रक्ख-रखाव आले कम्मं गी दिक्खदे होई उत्थें पैहले गै यात्रा बंद रखी गेदी ऐ। कश्मीर दे डिवीजनल कमीशनर बी.के.बिधूड़ी होरें आखेआ जे पहलगाम ते बालटाल दौनें रस्तें पर भारी बरखा करी मरम्मती ते रक्ख-रखाव आले कम्मं दी बड़ी सख्त लोड ऐ। उनें दस्सेआ जे अज्ज बालटाल थमां बी यात्रा दी इजाजत नेई दित्ती जाग। 29 जून थमां शुरू होई दी इस यात्रा दरान अजें गतर 5 लक्ख शा मते श्रद्धालु शिवें दे हिमलिंगम रूपै दे दर्शन करी चुके दे न। एह सलाना यात्रा 19 अगस्त गी रक्खड़ पुन्नेआ आले दिन सम्पन्न होई जाग। तोआई 382 श्रद्धालुएं दा इक होर जत्था अज्ज श्री बुड्डा अमरनाथ जी दी यात्रा लेई रवाना होआ। इंदे च 283 मर्द, 90 महिला ते 9 बच्चे शामिल न।



## PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम मन की बात राएं ओंदी 25 तरीक गी देश विदेश च रौहने आले श्रोताएं गी संबोधत करगंन। एह इस कार्यक्रम दी 113मीं किशत होग। लोक इस कार्यक्रम च शामिल कराने लेई अपने बचार ते सुझाह 23 अगस्त तोड़ी नरेन्द्र मोदी ऐप, My Gov Open Forum जां टोल फ्री नंबर 1800-11-7800 राएं भेजी सकदे न।



## LG-Polls

उपराज्यपाल मनोज सिन्हा होरें विश्वास जाहर कीता ऐ जे जम्मू कश्मीर च असेंबली दे चुनां तौले करोआए जांगन। उआं उनें आखेआ जे इस बारे लेई फैसला लैने दा हक ते अख्तियार चुनां आयोग दा ऐ। जम्मू यूनिवर्सिटी च मालवीय मिशन अध्यापकें दे सिखलाई केन्द्र दा उदघाटन करने परैत पत्रकारें कन्नै गल्लबात च श्री सिन्हा होरें आखेआ जे प्रधानमंत्री नरेन्द्र मोदी होरें जून म्हीने श्रीनगर दे अपने दौरे दरान एह टिप्पणी कीती ही जे जम्मू कश्मीर च तौले असेंबली दे चुनां करोआए जांगन। गृहमंत्री अमित शाह होरें बी 5 अगस्त 2019 गी संसद च आखेआ हा जे हदबंदी दे बाद असेंबली दे चुनां होंगन ते उचित समें पर राज्य दा दर्जा बी

ब्हाल करी दित्ता जाग। उनें आखेआ जे प्रदेश च चुनावं बारे फैसला लैने दा टकोहदा हक चुनावं आयोग गी ऐ।



## Crop Insurance

जम्मू कश्मीर दी अर्थबवस्था च बड्डा योगदान देने आले बागवानी खेत्तर लेई खास तौर पर आन्नी गेदी, फसल बीमा योजना गी लागू करने लेई सरकार आस्सेआ योजना बनाई जा'रदी ऐ। इस योजना राएं सैंकड़े बद्धे करसानें दी लाह पुज्जोग। योजना दा मकसद मौसम दे माड़े हालात ते कुदरती क्रोपिएं थमां सुरक्षा प्रदान करना ते सरबंधत हाडेंद ी मंगें गी पूरा करना ऐं प्रस्तावित फसल बीमा योजना, कुदरती क्रोपिएं, कीडत्रें ते बमारिएं करी प्रभावत फसलें दे नुकसान थमां करसानें गी होने आले नुकसान गिमां बचाने लेई आहन्नी गेई ऐं सरकार इस योजना गी असरदार ढंगै सिर लागू करने लेई बीमा कंपनिएं ते माली इदारें कन्नै सैहयोग दी योजना बना करदी ऐ। बीमे पर सब्सिडी दित्ती जाग जेह्दे नै एह करसानें लेई किफायती होइ जाग।



## Govt SAR

जम्मू कश्मीर सरकारै सरकारी मलाजमें आस्सेआ आपू अपनी जायजा रिपोर्ट जिसी सेल्फ असेसमेंट रिपोर्ट जां सार रिपोर्ट बी आखेआ जंदा ऐ, गी जमा कराने दी खीरी तरीक चालू माली ब'रे दी दूई तिमाही तोड़ी बधाई दित्ती ऐ। इस बारे जारी अधिसूचना मूजब अप्रैल कोला लेइयै जून 2024 तोड़ी दी, मलाजमें दी कारकरदगी बारे रिपोर्ट जमा कराने दी खीरी तरीक बधाइयै 20 अगस्त करी दित्ती गेई ऐ। इसै चाल्ली पैहली तिमाही दी सरबंधत रिपोर्टिंग ते कंट्रोलिंग अफसर आस्सेआ नजरसानी लेई खीरी तरीक 30 अगस्त 2024 तैह कीती गेइ ऐ। एह्दे इलावा गैर पंजीकृत मलाजमें गी ताकीद कीती गेदी ऐ जे ओब्बी अपने नां पोर्टल पर दर्ज करियै अपनी सार रिपोर्ट मित्थे गेदे समें दे अंदर-अंदर जमा कराई देन।



## Samba Tiranga

सांबा दे डिप्टी कमीशनर अभिषेक शर्मा हुंदी दिक्ख-रिक्ख हेठ जिला प्रशासन आस्सेआ बरजानी तलाब थमां बढोतरी ग्राउंड तगर इक बड्डी तिरंगा रैली दा सरिस्ता कीता गेआ। इस कार्यक्रमै च जिला अफसरें, सैक्टरल अफसरें, स्वयंसेविएं ते स्कूली बच्चें पूरे जोश कन्नै हिस्सा लैता ते किट्टै रलियै देशभक्ति दी भावना दा प्रदर्शन कीता। एह्दे शा पैहले प्रतिभागिएं राष्ट्र दे मुल्लें-कदरें गी बुलंद रखने दी सगंध चुक्की। बढोरी ग्राउंड पुज्जने पर उत्थें राष्ट्रगाण गाया गेआ ते एह्दे कन्नै एह कार्यक्रम सम्पन्न होई गेआ।



## Army Distributes

78में सवतत्रता दिवस दे सिलसिले च कल फौज नै राजौरी जिले दे मरचोला आले सरकारी मिडल स्कूल च बच्चें च कताबां-कापियां, पैप-पैंसलां ते स्टेशनरी दा होर दुआ समेयान बंडेआ। आकाशवाणी दे जम्मू संवाददाता नै जानकारी दित्ती ऐ जे इस चाल्ली दा समेयान गुज्जर बक्करवाल परोआरें दे उनें विद्यार्थिएं गी बी दित्ता गेआ जेह्दे सोए दरान अपने डेरें कन्नै पीर पंजाल दिएं उपरलिएं पहाड़िएं पर ढोकें च, एह्दे इलावा फौज नै कताबां कापियां बगैरा आले दोआले दे ग्राएं दे बच्चें गी बी उपलब्ध कराइयां जिंदे कश पढाई लेई बड़िया घट्ट सुविधां उपलब्ध होंदियां न। इस पैहल दा मकसद समाज दे हर वर्ग तोड़ी सब्बने लेई लाजमी शिक्षा दा संदेश पजाना हा जेह्दे नै इंदा ते पूरे समाज दा पूरा पराता विकास जकीनी बनी सकदा ऐं इस प्रोजेक्ट कन्नै फौज गी बी मुल्खे दे दूर दरेडे इलाके च रौहने आले लोकें कन्नै मिलने दा मौका थोआ ऐ।

